
PWYLLGOR YMGYNGHOROL HARBWR PWLLHELI 28/10/14

Presennol: Y Cyngorydd Michael Sol Owen (Cadeirydd)

David Dewsbury (Cymdeithas Cychod Hafan Pwllheli), W. A. Partington (Cymdeithas Masnachwyr Morwrol), Andrew Picken (Siambwr Fasnach Pwllheli) a Stephen Tudor (Clwb Hwyllo Pwllheli)

Aelod Cabinet: Y Cyngorydd John Wynn Jones (Aelod Cabinet - Economi)

Hefyd yn bresennol: Barry Davies (Swyddog Morwrol a Pharciau Gwledig), Wil Williams (Rheolwr Harbwr Pwllheli) a Bethan Adams (Swyddog Cefnogi Aelodau a Chraffu)

Ymddiheuriadau: Y Cyngorydd Peter Read (Cyngor Gwynedd) a'r Cyngorydd Mici Plwm (Cyngor Tref Pwllheli).

1. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

2. COFNODION

Llofnododd y Cadeirydd gofnodion cyfarfod o'r Pwyllgor Ymgynghorol a gynhaliwyd ar 19 Mawrth, 2014 fel rhai cywir.

3. ADRODDIAD Y GWASANAETH MORWROL

(a) Pwyllgorau Ymgynghorol Harbyrau

Adroddwyd y cymerir camau i gadarnhau aelodaeth y Pwyllgorau Ymgynghorol. Nodwyd bod angen derbyn cofnodion cyfarfodydd blynyddol diwethaf y mudiadau yn ogystal â'u cyfansoddiad. Eglurwyd ei bod yn bwysig derbyn y cofnodion er sicrhau bod y wybodaeth a roddir yn y Pwyllgor yn cael ei raeadru gan y cynrychiolydd i'r mudiad.

Gofynnwyd i'r aelodau gadarnhau efo'r Swyddog Cefnogi Aelodau a Chraffu manylion Ysgrifennydd eu mudiad er mwyn i'r swyddog gysylltu i dderbyn copi o gofnodion cyfarfod blynyddol diwethaf y mudiad yn ogystal â'u cyfansoddiad.

PENDERFYNWYD bod yr aelodau yn hysbysu'r Swyddog Cefnogi Aelodau a Chraffu o fanylion cyswllt Ysgrifennydd eu mudiad cyn diwedd mis Tachwedd 2014.

(b) Côt Diogelwch Harbyrau

Nodwyd bod y Côt wedi ei ddsbarthu i'r aelodau a ni dderbyniwyd sylwadau rhwng y cyfarfod diwethaf a'r cyfarfod yma. Pwysleisiwyd yr angen i'r aelodau gysylltu gyda'r Swyddog Morwrol a Pharciau Gwledig neu Reolwr Harbwr Pwllheli pan ddaw'r pryder i'r amlwg. Ychwanegwyd y byddai Harbwr Feistr Caernarfon, fel y 'Person Dynodedig' o dan y Côt, yn edrych yn annibynnol ar y Côt.

Nododd aelod ei fod wedi anfon pryder Cymdeithas Cychod Hafan Pwllheli, yng nghyswllt ansawdd y disel coch a ddarperir yn yr Hafan, i'r Swyddog Morwrol a Pharciau Gwledig ynghyd â Morwena Edwards (Cyfarwyddwr Corfforaethol) a oeddynt ar ddallt oedd y Deilydd Dyletswydd. Nododd ei anfonlonrwydd bod y mater wedi ei ddelio fel mater Safonau Masnach yn hytrach na mater diogelwch morwrol a'r amser a gymerwyd i dderbyn ymateb.

Mewn ymateb, eglurodd y Swyddog Morwrol a Pharciau Gwledig mai Cabinet y Cyngor oedd y Deilydd Dyletswydd ac nid Morwena Edwards (Cyfarwyddwr Corfforaethol). Ymddiheurodd am yr oedi o ran derbyn ymateb.

Nododd aelod y dylid edrych ar sefydlu trefn ar gyfer delio â materion a godwyd o dan y Côd.

PENDERFYNWYD bod y Cadeirydd a'r Swyddog Morwrol a Pharciau Gwledig i edrych ar sefydlu trefn o ddelio â materion a godwyd o dan y Côd Diogelwch Harbyrau.

(c) Academi Hwyllo

Nodwyd bod rhaglen adeiladu'r Academi Hwyllo yn agos i'r amserlen ond bod ychydig o oedi wedi bod efo cynhyrchu'r dur ar gyfer yr adeilad.

Nododd y Swyddog Morwrol a Pharciau Gwledig ei fod yn ffyddiog y byddai'r datblygiad cyffrous yma yn creu cyfleoedd ar gyfer yr harbyrau eraill yn ogystal â buddion i'r ardal yn ehangach.

(ch) Carthu Harbwr Pwllheli a'r Strategaeth Garthu

Adroddwyd bod y rhaglen waith carthu wedi ei gwblhau gyda phob bae yn yr Hafan wedi eu carthu i'r lefel priodol. Dangoswyd cynllun hydrograffeg yn dangos lefelau gwaddod presennol yr Hafan a'r Harbwr. Nodwyd mai gwaddod a ddaeth i mewn ar ôl cwblhau'r gwaith carthu oedd wedi arwain at gynnydd yn y lefelau mewn rhai manau mewn cymhariaeth a'r lefelau a nodwyd eisoes.

Diolchwyd i'r aelodau a oedd yn bresennol mewn gweithdy yng nghyswllt Strategaeth Garthu newydd ar gyfer Pwllheli a gynhaliwyd gyda chwmni Arup Associates. Nodwyd bod y cwmni mewn trafodaethau efo Cyfoeth Naturiol Cymru (CNC) ac yr anelir i gwblhau dogfen yn y dyfodol agos. Pwysleisiwyd bod Strategaeth Garthu yn holl bwysig ar gyfer y dyfodol.

Nodwyd bod capasiti yn y bwnd newydd ar gyfer un ymgyrch carthu arall a bod angen adnabod cyllid digonol ar gyfer y gwaith. Ychwanegwyd y byddai angen cynllun gwaredu ar gyfer y bwnd gwreiddiol ac y dylid ystyried y posibilrwydd o roi'r gwaddod yng Ngharreg y Defaid.

Mewn ymateb i sylw gan aelod parthed lefel y gwaddod yn fynedfa'r Harbwr, nododd y Swyddog Morwrol a Pharciau Gwledig bod y *bed leveller* wedi rhyddhau'r lympiâu yn y man yma ac yr adolygir y sefyllfa dechrau'r flwyddyn.

Nododd aelod bod Strategaeth Garthu glir yn holl bwysig i ddyfodol yr Hafan a Harbwr.

(d) Mordwyo ac Angorfeydd

Nodwyd bod Tŷ'r Drindod wedi cynnal archwiliad o'r cymhorthion mordwyo ac wedi rhoi 2 rybudd o beidio cydymffurfio. Eglurwyd bod y rhybuddion wedi eu tynnu o ganlyniad i gydweithio efo Tŷ'r Drindod ar ddatrysiaid.

Adroddwyd bod Cymdeithas Cychod Hafan Pwllheli wedi gwneud cais i wella goleuadau i mewn i'r harbwr, nodwyd bod y Swyddog Morwrol a Pharciau Gwledig a Rheolwr Harbwr Pwllheli yn ystyried y cais.

Nodwyd y bwriedir cynnal archwiliad pellach o'r angorfeydd yn fuan yn 2015 gyda'r gwaith yn cyd-redeg efo'r gwaith yn Harbwr Porthmadog.

(dd) Ystadegau Morwrol

Adroddwyd bod nifer cychod yn yr Hafan wedi lleihau, roedd hyn yn gyson â'r tuedd yn yr holl harbyrau. Nodwyd y gobeithir bod y tueddiad yma ar drothwy newid.

Nodwyd fel cywiriad i'r rhestr hydoedd a dyfnder cychod yn yr Hafan a amgaewyd yn y rhaglen mai 1.80 metr oedd dyfnder y cwch 'Han Solo'.

Nododd aelod ei bryder bod cychod lleol yn gadael yr Hafan a thynnodd sylw mai 76 oedd y nifer ar y rhestr diddordeb mewn angorfa yn y flwyddyn bresennol a llynedd. Mewn ymateb, nododd Rheolwr Harbwr Pwllheli bod yr unigolion yma ddim yn cymryd y cyfle i gael angorfa ond dal eisiau parhau ar y rhestr diddordeb.

Mewn ymateb i sylw gan aelod parthed rhesymau unigolion am adael yr Hafan, nodwyd mai canran isel o holiaduron a ddychwelir wedi eu cwblhau gan unigolion oedd yn gadael.

Nodwyd bod angen ystyried cynnig bargeinion er mwyn ceisio cynyddu niferoedd yn yr Hafan. Nododd cynrychiolydd Cymdeithas Cychod Hafan Pwllheli bod y gymdeithas yn fodlon cynnal trafodaethau gyda Chymdeithas Masnachwyr Morwrol Pwllheli yng nghyswllt hyn.

Nododd aelod pwysigrwydd marchnata'r Hafan a'r angen i edrych ar y ffioedd gan geisio bod yn gystadleuol gan gynnig bargeinion. Ychwanegodd ei fod yn ffyddiog y gellir dod i gapasiti llawn yn yr Hafan.

Ychwanegwyd bod angen edrych ar ffyrdd o farchnata'r Hafan ynghlwm a digwyddiadau yn yr Academi Hwyllo.

Tynnwyd sylw bod erthygl mewn cylchgrawn wedi rhoi'r camargraff bod newidiadau gan Cyfoeth Naturiol Cymru i ddynodiad Ardal Gwarchodaeth Arbennig (AGA) Glannau Aberdaron ac Ynys Enlli yn atal defnyddwyr rhag mordeithio yn yr ardal yma. Nodwyd bod angen darbwyllo unigolion nad yw hyn yn gywir.

PENDERFYNWYD bod y Swyddog Morwrol a Pharciau Gwledig yn cydweithio gyda'r Uwch Reolwr Economi a Chymuned i geisio defnyddio adnoddau marchnata yn fwy effeithiol gan gydweithio efo'r Academi Hwyllo.

(e) Cyllidebau

Dosbarthwyd yn y cyfarfod y dogfennau canlynol:

- Cyllideb Terfynol 2013/14 Hafan Pwllheli
- Cyllideb Terfynol 2013/14 Harbwr Pwllheli
- Cyllideb Hafan Pwllheli Diwedd Medi 2014
- Cyllideb Harbwr Pwllheli Diwedd Medi 2014

Ymddiheurodd y Swyddog Morwrol a Pharciau Gwledig nad oedd y dogfennau wedi eu cylchredeg cyn y cyfarfod ond mai diwrnod cyn y cyfarfod y derbyniodd y wybodaeth gan yr Adran Gyllid.

Tywyswyd yr aelodau drwy'r cyllidebau gan y Swyddog Morwrol a Pharciau Gwledig.

Nododd aelod ei ddymuniad bod canran o elw'r Hafan o £573,710 ar ddiwedd y flwyddyn ariannol ddiwethaf yn cael ei fuddsoddi yn ôl yn yr Hafan ar gyfer gwaith carthu a chynnal a chadw. Ychwanegodd y dylid anfon neges glir i'r Cabinet bod angen buddsoddi ar gyfer gwella'r adnodd.

Mewn ymateb, nododd y Swyddog Morwrol a Pharciau Gwledig bod yr elw ar ddiwedd y flwyddyn yn cyfrannu at wasanaethau eraill o fewn y Cyngor ond y trosglwyddir £120,000 o gyllideb y Gwasanaeth Morwrol a Pharciau Gwledig bob blwyddyn i gronfa ar gyfer gwaith carthu a gwelliannau eraill oddi fewn y gwasanaeth.

Mewn ymateb i sylw gan aelod, nododd y Swyddog Morwrol a Pharciau Gwledig ei fod yn ffyddiog y gellir agosáu at y targed incwm ar gyfer angorfeydd parhaol erbyn diwedd y flwyddyn ariannol bresennol.

(f) Ffioedd 2015/16

Adroddwyd y bwriedir cynyddu ffioedd 2015/16 yn unol â chwyddiant.

Nodwyd bod cais wedi ei wneud gan Gymdeithas Cychod Hafan Pwllheli i adolygu'r cynllun bandio a'u dymuniad oedd bod ffioedd angorfeydd blynyddol ac ymwelwyr yn seiliedig ar fandiau ½ medr, yn hytrach na fesul 2 medr, yn enwedig ar gyfer cychod o dan 11 medr. Eglurwyd na ragwelir potensial i symud oddi wrth y cynllun bandio presennol gan y byddai'n golygu cynllun LOA yn cydreddeg efo'r cynllun bandio.

(ff) Disel Coch

Adroddwyd ymhellach i drafodaethau yng nghyfarfodydd diwethaf y Pwyllgor, bod Cymdeithas Cychod Hafan Pwllheli dal o'r farn nad oedd y disel coch a gyflenwir yn yr harbyrau o dan reolaeth Cyngor Gwynedd yn addas ar gyfer cychod sydd yn mordeithio.

Nododd y Swyddog Morwrol a Pharciau Gwledig bod y dogfennau a rannwyd i'r aelodau parthed ansawdd disel coch yn cynnwys cadarnhad gan y cyflenwr presennol bod y disel coch a gyflenwir i'r holl harbyrau o dan reolaeth Cyngor Gwynedd yn cydymffurfio â BS2869-A2.

Nodwyd bod ymholiadau wedi eu gwneud hefo cyflenwyr a oedd yn gwerthu disel coch heb FAME (*Fatty-acid methyl ester*) ond gan fod isafswm archeb yn 22,000 litr o ddisel coch ac ond capasiti yn y tanc ar gyfer 20,000 litr ni fyddai'n bosib.

Ychwanegwyd bod y Bad Achub yn defnyddio'r un math o ddisel coch a thybir y byddent wedi codi'r mater os oedd ganddynt bryderon diogelwch.

Nododd aelod y dylid ystyried y deliwyd efo'r mater gan fod y Bad Achub yn defnyddio'r disel coch a bod cadarnhad wedi ei dderbyn gan y cyflenwr ei fod yn cydymffurfio â'r gofynion.

Nododd cynrychiolydd Cymdeithas Cychod Hafan Pwllheli ei fod yn ddyletswydd ar y gymdeithas i ddod a'r mater i sylw'r Cyngor yn ogystal â rhybuddio defnyddwyr i beidio defnyddio'r disel coch yma.

PENDERFYNWYD bod y Swyddog Morwrol a Pharciau Gwledig yn anfon ymlaen at gynrychiolydd Cymdeithas Cychod Hafan Pwllheli gwybodaeth ysgrifenedig gan y cyflenwr.

(g) Marchnata

Adroddwyd bod 3 hysbyseb wedi ymddangos yng nghylchgrawn 'Practical Boat Owner' (PBO).

Nododd cynrychiolydd Clwb Hwyllo Pwllheli bod gan Plas Heli gyllideb ar gyfer marchnata a'i fod yn hollbwysig bod y Cyngor a'r cwmni yn cydweithio ar farchnata er cynyddu niferoedd yn yr Hafan ac i geisio denu unigolion a fyddai'n arferol yn mynd i leoliadau arall. Ychwanegodd y byddai Swyddog Marchnata Plas Heli yn dod i gysylltiad â'r Gwasanaeth Morwrol yng nghyswllt y mater.

(ng) Rhaglen Waith Cynnal a Chadw'r Gaeaf

Manylodd y Swyddog Morwrol a Pharciau Gwledig ar raglen waith cynnal a chadw'r Gaeaf.

Gofynnwyd i'r aelodau dynnu sylw'r Gwasanaeth Morwrol at unrhyw waith a oedd angen ei gwblhau.

(h) Llithrfa

Adroddwyd bod cwmni lleol, sef Total Boat Care wedi cynorthwyo gyda rheolaeth y llithrfa a bod y trefniant yn gweithio'n effeithiol yn ystod 2014.

4. Cyfarfod Nesaf

Nodwyd y caiff y cyfarfod nesaf ei gynnal ar 31 Mawrth, 2015.

Dechreuodd y cyfarfod am 6.00pm a daeth i ben am 7.45pm